

朱駿聲文集

遼寧署

民國七年九月出版

朱駿聲文集

定價四角

印行者

心

社

發行所

北京中華新報館

寄售處

北京天津中華書局及各大書坊

朱駿聲文集目錄

卷一

答太歲太陰問

養菽二字辨

楊揚一氏辨

四配十哲考

書說附尚書序凡例

明嘉靖大禮說

釋鬼

恕字銘爲朱鏡蓉作

策問二首

擬臯己求賢詔

擬三月三日曲水詩序

卷二

說文通訓定聲自序

說文

通訓

定聲

轉注

段借

聲母千文

卷三

夏小正補傳序

小爾雅約注序

孔子三朝記序

刻參同契序

古今韻準自序

儀禮經注一隅弁言

六書段借經徵弁言

離騷補注弁言

卷四

臨嘯閣詩餘自序

朱氏支譜序

屏山朱氏重修支譜序

屏山詩乘續集序

朱質齋培文榷林山房詩鈔序

朱謙山 鐘 羣玉山堂文集序

胡伯臣 文 鍾 詩集序

施秀亭 文 鍾 詩集序

佩韋之室跋語

書明史後

書東雅堂昌黎集後

書董文敏臨米南宮天馬賦殘卷後

復貴池拔貴陳信吾之瑞書

卷五

朱晉康樂道山房記

屏山朱氏節孝祠記

記宋助教佚事

記劍俠

家黃亭先生傳

僕者陳忠傳

徐君振昌小傳

吳卿憐小傳

孔方傳

朱駿聲文集卷一

答太歲太陰問



或問漢術分太歲太陰爲二太陰亦曰青龍而爾雅太歲在寅曰攝提格云云後總題曰歲名解者以爲歲陰者乃謂天幹爲陽地枝爲陰然則太陰即歲陰歲陰即太歲後人何以強分爲二歟曰太歲實即歲星上古以歲星所次之辰紀年即攝提格云云也但歲星一年行一辰十二年一周天而五行也有疾有留逆有伏積一百四十有四年必超一辰不能與排定之紀年相應故愈差愈遠（計歷千七百二十八年而超辰一周排定之甲子則千七百四十年而於辰二十九周其第一千七百四十一年後之六十甲子當與歲星相應至一千八百零年外又漸差漸遠及第一千八百七十二年而歲星又超一辰矣）其前不可得聞已考漢太初元年闕逢攝提格之歲是爲甲寅而漢志謂其在丙子歲星在丑則與古以歲星所次之辰紀年者寅與丑差一算與漢志排定紀年之辰亦子與丑差一算於是以排定之辰強命爲

太歲以取合於歲星所次之辰（如歲在子則太歲在丑歲星在寅則太歲在亥）因以古之攝提格等強命爲太陰爲青龍而謂在太歲之前二辰（如太歲寅則歲陰辰太歲酉則歲陰亥）凡以求合於古之歲名（攝提格等）與當時排定之年名（如丙子）及實測歲星所在之辰名（如星紀丑）使三者均不相悖故遷就而爲此至於今則又大不然按乾隆二十九年甲申以前以三統術推之率差三算至甲申年星超一辰逮今道光年間率差二算然差二算者恰以三統之太歲當太陰以三統之太陰當太歲則與實測歲星相準如今以道光十四年甲午爲厯元其年歲星在酉則太歲當在辰而太陰當在午若依三統之太陰紀年曰道光甲午紀年（不云闕逢敦牂）依三統之太歲紀歲曰太歲柔兆執徐（不云丙辰）以歲星所在紀星曰星在大梁則名實不紊而今之時憲實似以太陰紀年也但繼自今六十年後即又不合治厯明時所以取諸革歟倘每年實測歲星以合於上古之紀年斯厯之萬禩而不變當直曰道光十有四年太歲在強圉作噩星在大梁而已雖然當世之人得毋笑

人得毋笑其讀爾雅不熟也

養羖二字辨

說文能字弟五下食部養供養也從食羊聲羖古文按从支羊聲與養異字古文假借通寫耳當分羖爲正篆廣雅說詁一養使也即羖字之訓故从支易說卦傳兌爲妾爲羊（羊鄭本作陽訓女使虞本作羔亦訓女使謂舊讀羊已見上兌爲羊此爲再出非孔子意也駿按羔誤字當作羔陽羔皆羖字之同聲段借）書大誥民養其勸弗救（傳廝養也謂人之臣僕漢書翟義傳引作民長解誤也）儀禮既夕記養者皆齋（疏男女養疾）禮記文王世子齋元而養（注養疾）檀弓左右就養有方（注不可侵官）公羊宣十二年傳廝役扈養（注炊烹者曰養）論語爲政至千犬馬皆能有養（包注犬以守禦馬以代勞皆養人者也）陽貨惟女子與小人爲難養也（疏謂難畜養非）孟子娶妻非爲養也（注謂親執釜竈）管子輕重乙五乘者有伍養韓非子內儲說上七術豎牛因獨養之又外儲說右下家人有年老而自養者漢

書陳餘傳有廝養卒兒寬傳嘗爲弟子都養後漢書劉聖公傳竈下養中郎將宦者傳易以役養以上經史所用養字皆即𡥉字也又夏小正三月執養宮事傳與養日養夜同訓長非是凡養訓長者謂字之借爲兼非養本有長訓也

楊揚一氏辨

楊氏始見於春秋傳楊食我戰國有楊朱漢唐以來惟漢書揚雄傳寫柔从手旁說者云子雲好奇之過其氏特自標異然古有吹律知姓者有避諱避仇易姓者有以功以惡賜姓者若無故而自更氏族則未之前聞此其說非也雄反離騷曰有周氏之蟬嬀兮或鼻祖于汾隅靈宗初謀伯僑兮流于末之揚侯據雄自叙系出有周伯僑以支庶食采于晉之揚因氏焉周衰而揚氏或稱侯會韓魏趙興偁揚侯揚侯逃于楚按左氏春秋襄公二十九年傳女叔齊曰虞虢焦滑霍楊韓魏皆姬姓也晉是以大（石經初刻楊字从木不誤）是楊國滅于晉後爲羊舌肸采昭公二十八年傳僚安爲楊氏大夫即其地也在今山西平陽府洪洞縣與僖公十一年傳揚拒泉皋

按鄭國碑及唐誌興
義從梁恩之表是金
書揚雄之姓皆作
楊亦以寸

民揚星量其子及子
之其說且也朱文情
金石跋云楊與揚用
之其說且也朱文情
所著揚雄私印皆信

伊洛之戎昭公二十二年傳劉子奔揚在今河南河南府洛陽縣者迥別叔向之子
揚食我以邑爲氏者也考宋羅泌路史云宣王子尙父幽王封之爲楊侯疑伯僑乃
尙父之裔即春秋前滅于晉者雄叙或頗踈蹕而其字則必非以手也後人徒以子
雲好奇又有雄無他揚于蜀之語故傳寫獨作揚颺謬至今嘗讀三國魏志陳思王
傳裴注引魚象典畧楊德祖答植書云脩家子雲老不曉事豈德祖之氏亦當以手
耶唐孔穎達尙書堯典疏稱楊子法言宋大中祥符之廣韻治平之集韻司馬光之
類篇字凡有姓者注皆云又姓楊注有而揚注無知北宋之前尙未有以手之說矣
夫楊揚皆形聲字誼別而音同論六書畧借之法如鄭鄠之鄠國今作許心呂之呂
侯或作甫遽數之不能終大氏習非成是相承不改故以楊揚爲通寫尙屬沿譌以
楊揚爲殊族竟成杜撰至宋鄭樵通志氏族畧竟據漢書誤字并春秋之楊食我與
楊氏大夫俱改作揚意欲胥古今氏楊者而盡揚之謬妄不已甚乎因黥士胡文銓
得銅章一文曰揚雄私印徵詩于余旣爲作歌而復辨之如此

四配十哲考

東漢以來惟闕里有孔子廟祀享其他郡縣皆于學校祀周公孔子周公爲先聖南向孔子爲先師西墉東向唐高祖武德二年始詔國子學立周孔廟太宗貞觀二年以周公配武王祀停祭于學升孔子爲先聖仍東向顏子爲先師配焉（元魏齊王芳王始二年使太常以太牢祀孔子于辟廱配以顏淵實弟子配享之始）四年始詔州縣皆立孔廟高宗總章元年贈顏子太子少師曾子太子少保睿宗太極元年加贈太子太師太子太保並祀于廟元宗開元八年初定四科十人悉與享改立侍爲坐像曾子亦特爲像坐亞之餘皆圖像于壁小祀二十七年始定孔子南向後唐明宗長興三年始令七十二賢俱祠享宋神宗元豐七年始以孟子與顏子並配徽宗大觀二年始躋子思子從祀政和三年妄以王安石與顏孟並配理宗淳祐元年黜之始以朱子從祀度宗咸淳三年始定顏曾思孟四子配享廟殿皆正位西向北上升顯孫子于十哲殿中東西對列國朝康熙五十一年升朱子稱先賢列十哲之

次乾隆三年升先賢有子列東哲之次爲今之十二哲（四配東西分列不知昉于何時俟考）

書說

孔子序書百篇自秦焚後亡者四十三篇臺飢帝告釐沃湯征汝鳩汝方夏社疑至臣扈仲虺之誥明居祖后太甲三篇沃丁咸乂四篇伊陟仲丁河亶甲祖乙說命三篇高宗之訓分器旅巢命微子之命歸禾嘉禾蔡仲之命成王政將蒲姑周官賄息慎之命亳姑君陳康王之誥君牙囿命是也餘五十七篇漢建武時又逸其一武成是也至西晉永嘉之亂逸者又二十六篇舜典汨作九共九篇大禹謨益稷五子之歌允征湯誥咸有一德典寶伊訓肆命原命泰誓三篇旅獒畢命是也亡逸凡七十篇僅存三十篇則堯典連慎徽以下皋陶謨連帝曰來禹以下禹貢甘誓湯誓盤庚三篇高宗彤日西伯戡黎微子牧誓洪範金縢大誥康誥酒誥梓材召誥洛誥多士無逸君奭多方立政顧命連王若曰以下呂刑文侯之命費誓秦誓是也東晉枚頤

所獻僞本於眞書三十篇中割堯典之半以當舜典割皋陶謨之半以當益稷依馬鄭分顧命之半以當康王之誥是爲三十三篇而妄於秦焚久亡之書造仲虺之誥太甲三篇說命三篇微子之命蔡仲之命周官君陳君牙囧命十三篇於建武永嘉散逸之書造大禹謨五子之歌允征湯誥咸有一德伊訓泰誓三篇武成旅獒畢命十二篇故今五十八篇中凡眞書三十三篇實三十篇僞書二十五篇疑皆皇甫謐摭摭他書所引依傍爲之間有杜撰者也厥後蕭齊姚方興又造舜典首十二字隋之劉炫復造濬哲以下十六字則又作僞之末流重坐臆謬者矣（皇甫謐帝王世紀王肅家語及聖證論束皙汲冢紀年皆暗與晚書說合）亡書有殘章牘句見於典籍所引者如商書帝告見尙書大傳湯征見孟子史記仲虺之誥見左傳墨子荀子太甲見大學緇衣說命見學記文王世子坊記表記喪服四制論語楚語孟子墨子尸子離騷呂覽史記潛夫論說苑周書如嘉禾見漢王莽傳蔡仲之命見左傳逸周書作維周官見周禮注周禮疏引鄭志漢百官公卿表賈誼傳君陳見緇衣坊記

春秋繁露君牙見緇衣而四十三篇之全文則漢儒已目所未覩故漢時存者惟伏生所授今文堯典連慎微以下皋陶謨連帝曰來禹以下禹貢甘誓湯誓盤庚不分篇高宗彤日西伯戡黎微子太誓不分篇牧誓洪範金縢大誥康誥酒誥梓材召誥洛誥多士無逸君奭多方立政顧命連王若曰以下費誓呂刑文侯之命秦誓所謂二十九篇也其後又得孔壁真古文以較今文增多二十九篇則舜典汨作九共九篇大禹謨益稷五子之歌允征湯誥咸有一德典寶伊訓肆命原命盤庚分多中下二篇太誓分多中下二篇武成旅獒顧命分出康土之誥一篇畢命所謂五十八篇也其實止多二十四篇蓋盤庚太誓顧命伏本咸有惟不析篇第耳且康王之誥實亡乃衛賈馬鄭於顧命分出當之者則實多伏本二十三篇也但此增多之真古文漢建武間武成一篇又逸西晉永嘉之亂二十二篇盡逸而太誓殘篇僅見史記周本紀中於是百篇之書祇存三十矣

凡例

一晚書不注但著其引用出處

一篇第仍依今本不以古目爲叙

一地名山水必注明本朝可何省何縣

一注中某某也某也上某爲段借下某爲段借字之訓如尙上也高也言尙字借爲上字上字之訓則高也此依詩毛傳壞木壞癭也調飢調朝也之例餘仿此

一古注不專從鄭雖宋人說弗廢實事求是頗有折衷

一逸篇之句間有見於古書所引者零章斷句既無全文或難索解亦復略之

一注中某某也猶某也所謂猶者皆轉注之誼如旣汽也猶盡也汽之本訓爲水水之汽也涸其引申之誼則爲盡也稽計也猶考覈也計之本訓爲會算其引申之誼爲考覈也

明嘉靖大禮說

明世宗以興獻王子入嗣大統於憲宗爲庶孫於孝宗爲從子於武宗爲從弟此傳